

Na osnovu člana 23. (b) Ustava Bosansko-podrinjskog kantona Goražde, („Službene novine Bosansko-podrinjskog kantona Goražde“, broj:8/98, 10/00, 5/03), člana 75. Zakona o sportu u Bosni i Hercegovini („Službeni glasnik Bosne i Hercegovine“ broj:27/08, 102/09) i člana 106. Poslovnika Skupštine Bosansko-podrinjskog kantona Goražde („Službene novine Bosansko-podrinjskog kantona Goražde“, broj:10/08), Skupština Bosansko-podrinjskog kantona Goražde, na \_\_\_\_\_ sjednici, održanoj \_\_\_\_\_ 2010.godine, d o n o s i:

## ZAKON O SPORTU

### DIO PRVI – OPĆE ODREDBE

#### Član 1.

##### (Predmet Zakona)

Ovim zakonom se uređuje sport u Bosansko – podrinjskom kantonu Goražde, javni interes, ciljevi i nadležnost Bosansko – podrinjskog kantona Goražde (u daljem tekstu: Kanton), definicija osnovnih pojmova, osnovni principi u organiziranju sporta, prava i obaveze sportista, način organiziranja domaćih i međunarodnih sportskih takmičenja, sportskih priredbi, definicija sportskih objekata, organiziranje i rad ustanova i preduzeća u oblasti sporta, sportske aktivnosti lica sa invaliditetom, nagrade i priznanja sportistima i sportskim organizacijama, zdravstvena zaštita sportista, sprečavanje i suzbijanje svih oblika nasilja i nedoličnog ponašanja gledalaca, sprečavanje korištenja nedozvoljenih stimulativnih sredstava u sportu, stručni rad, informatika u sportu, finansiranje sportskih aktivnosti, nadzor nad provođenjem propisa i kaznene odredbe.

#### Član 2.

##### (Definisanje osnovnih pojmova)

Pojedini nazivi koji se koriste u ovom zakonu imaju sljedeće značenje:

- a) **Sport**, u smislu ovog zakona, obuhvata:
  - 1) organizovane tjelesne aktivnosti djece, omladine i odraslih građana, koje se ostvaruju u okviru stručno vođenog tjelesnog vježbanja i sportskog treninga;
  - 2) posebno organizovane tjelesne aktivnosti i igre radi postizanja sportskih dostignuća, koja se ostvaruju prema utvrđenim takmičarskim pravilima, u oblasti sporta za lica sa invaliditetom, kvalitetnog sporta i vrhunskog sporta;
  - 3) sportska takmičenja i priredbe;
  - 4) stručne poslove lica koja planiraju, organizuju i vode sportske aktivnosti, te pripremaju druga lica za učešće na sportskim takmičenjima.
- b) **Sportista** u smislu ovog zakona je fizičko lice koje se bavi sportskim aktivnostima i to:
  - 1) kao član pravnog lica koje obavlja sportsku djelatnost učestvovanja u sportskim takmičenjima,
  - 2) kao lice koje obavlja samostalnu sportsku djelatnost učestvovanja u sportskim takmičenjima.
- c) **Učesnici u sportu su**: sportisti, sudije, delegati i sportski treneri.
- d) **Vrhunski sport** je priprema i takmičenje sportista koji su po svojim rezultatima postali članovi državne selekcije Bosne i Hercegovine i koji su na sportskim takmičenjima postigli vrhunske sportske rezultate ili koji su pojedinačno postigli vrhunske rezultate po međunarodnim normama u odgovarajućoj sportskoj disciplini.

- e) **Kvalitetni sport** je priprema i takmičenje sportista po unaprijed utvrđenom sistemu i pravilima takmičenja koja se organizuju na području dva ili više kantona, na području Federacije BiH ili na cijelom prostoru Bosne i Hercegovine.
- f) **Sport za lica sa invaliditetom** je sportska aktivnost u okviru koje se licima sa invaliditetom obezbjeđuju jednake mogućnosti za organizovano bavljenje sportom i sportskom rekreacijom.
- g) **Sportska rekreacija** obuhvata organizovane ili individualne sportske aktivnosti djece, omladine i odraslih građana, koje se ostvaruju u okviru različitih oblika tjelesnog vježbanja i nemaju organizovane takmičarske oblike.
- h) **Sportski odgoj i obrazovanje** obuhvata tjelesne i sportske aktivnosti djece, omladine i odraslih građana, koje se ostvaruju u okviru nastavnih planova i programa predškolskih ustanova, osnovnih i srednjih škola, univerziteta, kao i u okviru programa sportskih klubova.
- i) **Sportske aktivnosti** su aktivnosti koje obuhvataju fizičko vježbanje (obučavanje, trening i rekreativna aktivnost) i sportske priredbe (sportska takmičenja i sportske manifestacije).
- j) **Sportske djelatnosti** su djelatnosti kojima se omogućavaju sportske aktivnosti, odnosno o bezbjeduju uslovi za njihovo obavljanje, a naročito: obučavanje, planiranje i vođenje fizičkog vježbanja; sportsko suđenje; organizovanje sportskih priprema i takmičenja; iznajmljivanje opreme i objekata; poslovi stručnog osposobljavanja, usavršavanja i informisanja; naučno-istraživački rad; savjetodavne i stručne usluge;
- k) **Sportski objekat** je građevina, odnosno prostor (građevinski objekat, odnosno njegov dio ili uređena površina), namijenjen za sportske aktivnosti, koji može da ima prateći prostor (sanitarni, garderobni, spremišni, gledališni i drugi) i ugrađenu opremu (građevinsku i sportsku).
- l) **Granski savez** je udruženje sportskih organizacija u koje se udružuje pravne osobe koje obavljaju sportske djelatnosti u istom sportu, a koji radi ostvarivanja zajedničkih interesa u pojedinom sportu naročito: usklađuje aktivnosti svojih članica; organizuje, uređuje i provodi sistem takmičenja; uređuje pitanja koja se odnose na registraciju sportista, njihov status, te odgovornost sportista; promoviše stručni rad u sportu i brine se o kategoriziranim sportistima u okviru te grane sporta.
- m) **Sportska pravila** su opšti akti nadležnih nacionalnih, entitetskih i kantonalnih granskih sportskih saveza, kojima se uređuje obavljanje sportskih aktivnosti i djelatnosti i ostvarivanje utvrđenih sportskih ciljeva.

## POGLAVLJE I. OSNOVNI PRINCIPI U SPORTU

### Član 3.

#### (Osnovni principi organizacije sporta)

Osnovni principi na kojima se organizira sport u Bosansko – podrinjskom kantonu Goražde kantonu su:

- a) prava i slobode sportista,
- b) afirmacija duha olimpizma,
- c) pravo svih građana da se bave sportom pod jednakim uvjetima bez obzira na nacionalnu, vjersku, političku, rasnu, socijalnu i spolnu pripadnost,
- d) ostvarivanje javnog interesa Kantona u ovoj oblasti i obaveza kantonalnih organa da zakonima i na drugi način, materijalnom podrškom i programima razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih sportskih rezultata,

- e) osiguravanje zdravstvene zaštite sportista i sprečavanja upotrebe nedozvoljenih stimulativnih sredstava,
- f) stručnost u radu i podsticanje naučno istraživačkog rada, primjenom savremenih metoda rada, informatike i izdavačke djelatnosti,
- g) pravilo da se svi sporovi između sportista, sportskih organizacija i organa rješavaju isključivo preko i unutar odgovarajućih sportskih organa i arbitražnih sportskih tijela,
- h) autonomnost sportskih organizacija u pogledu uređivanja unutrašnjih odnosa i udruživanja.

## **POGLAVLJE II. JAVNI INTERES I CILJEVI BOSANSKO – PODRINJSKOG KANTONA GORAŽDE U SPORTU**

### **Član 4.**

#### **(Javni interes i ciljevi)**

(1) Sport u Bosansko – podrinjskom kantonu Goražde (u daljem tekstu: Kanton) je djelatnost od javnog interesa.

(2) Javni interesi i ciljevi Kantona u sportu su:

- a) razvijanje svijesti građana, posebno mladih i osoba sa invaliditetom o sportu i njegovim vrijednostima,
- b) doprinos vaspitanju, obrazovanju i razvoju djece i omladine,
- c) podsticanje i afirmiranje sporta i njegovih vrijednosti kao dijela kulture i ukupnih materijalnih i duhovnih vrijednosti društva,
- d) očuvanje zdravlja kao osnove svake ljudske aktivnosti, radne produktivnosti, izražavanja stvaralaštva i humanog življenja,
- e) podsticanje sistematskog i organiziranog bavljenja sportom u slobodno vrijeme,
- f) sistemsko stvaranje uvjeta za ostvarivanje vrhunskih sportskih rezultata,
- g) organizacija sistema takmičenja u skladu sa pravilima međunarodnih sportskih federacija,
- h) sport za lica sa invaliditetom,
- i) školski i studentski sport.

### **Član 5.**

#### **(Ostvarivanje javnog interesa u sportu)**

- (1) Radi ostvarivanja javnog interesa i ciljeva u oblasti sporta utvrđuje se Strategija razvoja sporta u Kantonu (u daljnjem tekstu: Strategija).
- (2) Strategija se donosi za period od najmanje četiri godine.
- (3) Strategiju usvaja Skupština Bosansko – podrinjskog kantona Goražde ( u daljem tekstu: Skupština Kantona), na prijedlog Vlade Bosansko – podrinjskog kantona Goražde (u daljem tekstu: Vlada Kantona).

### **Član 6.**

#### **(Sadržaj Strategije)**

Strategijom se utvrđuju:

- a) osnovna polazišta i pravci razvoja,
- b) sadržaj i obim sportskih djelatnosti koji se finansiraju, odnosno sufinansiraju iz budžeta Kantona,
- c) razvojni i stručni zadaci u sportu,
- d) okvirni kriteriji za vrednovanja programa i njihovog finansiranja u sportu,
- e) nosioci razvoja i mjere kontrole njegove realizacije.

## **Član 7.**

### **(Godišnji sportski programi)**

- (1) Na osnovu Strategije, donose se godišnji programi razvoja sporta (u daljem tekstu: godišnji sportski programi).
- (2) Kantonalni godišnji sportski program za tekuću kalendarsku godinu donosi Vlada Kantona.
- (3) Općinski godišnji sportski program za tekuću kalendarsku godinu donosi nadležni organ općine.
- (4) Godišnji sportski programi za tekuću godinu donose se najkasnije do 01. marta tekuće godine.

## **Član 8.**

### **(Vijeće za sport Bosansko – podrinjskog kantona Goražde)**

- (1) Vijeće za sport Bosansko – podrinjskog kantona Goražde (u daljem tekstu: Vijeće) broji pet članova i najviše je savjetodavno tijelo Vlade Kantona, koje se brine za razvoj i kvalitet sporta na nivou Kantona.
- (2) Vijeće je nadležno za:
  - a) davanje mišljenja o Strategiji,
  - b) davanje mišljenja o Programu razvoja sporta,
  - c) davanje mišljenja o godišnjim planovima i finansijskim potrebama sporta,
  - d) raspravu o pitanjima značajnim za sport, te predlaganje i podsticanje donošenje mjera za unapređenje sporta,
  - e) predlaganje prioretetnih projekata, elaborata i studija za njihovo finansiranje u sistemu javnih potreba u sportu,
  - f) predlaganje smjernica za izradu propisa o kategorizaciji sportista,
  - g) davanje mišljenja i preporuka za nacрте i prijedloge propisa koji se odnose na sport,
  - h) obavljanje i drugih poslova utvrđenih ovim zakonom i drugim propisima.

## **Član 9.**

### **(Imenovanje i sastav Vijeća)**

- (1) Vijeće imenuje Vlada Kantona na prijedlog Sportskog saveza Bosansko podrinjskog kantona Goražde (u daljem tekstu: Sportski savez Kantona) usaglašen sa Ministarstvom za obrazovanje, nauku, kulturu i sport Kantona (u daljem tekstu: Ministarstvo) iz reda istaknutih sportista i sportskih radnika.
- (2) Vijeće se imenuje na period od četiri godine.
- (3) Vijeće jednom godišnje podnosi izvještaj o svom radu Ministarstvu.
- (4) Administrativne poslove za Vijeće obavlja Sportski savez.
- (5) Vijeće donosi Poslovnik o radu, na koji saglasnost daje ministar za obrazovanje, nauku, kulturu i sport Kantona (u daljem tekstu: ministar).
- (6) Vijeće ima predsjednika i zamjenika predsjednika.

## **DIO DRUGI – ORGANIZIRANJE SPORTA**

## **Član 10.**

### **(Nosioци sportskih aktivnosti)**

Nosioци sportske aktivnosti u Kantonu su pravna i fizička lica registrirana za obavljanje sportskih aktivnosti u skladu sa zakonom.

### **Član 11.**

#### **(Upis u registar)**

- (1) Pored upisa u sudski, odnosno registar udruženja u Ministarstvu za pravosuđe upravu i radne odnose Kantona, sportsko pravno lice se upisuje u Registar sportskih pravnih lica (u daljem tekstu: Registar) koji vodi Ministarstvo.
- (2) Rješenje o upisu u Registar donosi ministar.
- (3) Bliži propis o vođenju registra pravnih i fizičkih lica u oblasti sporta na nivou Kantona donosi Ministarstvo.

### **Član 12.**

#### **(Školske sportske sekcije i klubovi)**

- (1) S ciljem napretka školskog sporta u osnovnim i srednjim školama, mogu se osnivati učeničke sportske sekcije ili klubovi.
- (2) Odluku o osnivanju učeničkog sportskog kluba donosi školski odbor. Učenički sportski klubovi nemaju status pravnih lica i djeluju u sastavu škole.
- (3) Učenički sportski klubovi svoje aktivnosti provode u skladu sa ovim Zakonom, zakonima i propisima kojima se uređuje osnovno odnosno srednje obrazovanje i posebnim odlukama Ministarstva.

### **Član 13.**

#### **(Sistem takmičenja osnovnih i srednjih škola, školskih klubova/sekcija)**

- (1) Sistem takmičenja osnovnih i srednjih škola i/ili učeničkih sportskih klubova, odnosno sekcija, određuje Aktiv nastavnika tjelesnog i zdravstvenog odgoja Bosansko – podrinjskog kantona Goražde.
- (2) Prijedlog sistema takmičenja iz stava (1) ovog člana obavezno se dostavlja Ministarstvu na prethodnu suglasnost.
- (3) Nadzor nad provođenjem takmičenja iz stava (1) ovog člana provodi Ministarstvo.

## **POGLAVLJE I. PRAVNA LICA U OBLASTI SPORTA**

### **Član 14.**

#### **(Pravna lica)**

Pravna lica u oblasti sporta (u daljem tekstu: sportske organizacije) u smislu ovog zakona su:

- a) sportski klub (amaterski i profesionalni),
- b) sportsko društvo,
- c) sportski savez,
- d) sportski savez u određenom sportu (granski),
- e) sportski klub invalidnih lica (amaterski i profesionalni),
- f) sportski savez invalidnih lica,
- g) udruženja sportske rekreacije,
- h) ustanove u oblasti sporta i
- i) privredna društva i javna preduzeća u oblasti sporta.

### **Član 15.**

#### **(Sportski klub)**

- (1) Osnovni oblik organizovanja u sportu je sportski klub.
- (2) Sportski klub može obavljati sportsku aktivnost amaterski i profesionalno.

## **Član 16.**

### **(Amaterski sportski klub)**

Amaterski sportski klub je dobrovoljna, nevladina, neprofitna organizacija koja se osniva i registruje kao udruženje građana za obavljanje sportske djelatnosti, u skladu sa Zakonom o udruženjima i fondacijama Federacija BiH i ovim zakonom.

## **Član 17.**

### **(Način osnivanja amaterskog sportskog kluba)**

- (1) Amaterski sportski klub osniva se osnivačkim aktom.
- (2) Amaterski sportski klub mogu osnovati domaća, pravna i fizička lica.
- (3) Amaterski sportski klub iz stava (1) ovog člana mogu osnovati najmanje 3 fizička lica ili pravno lice.

## **Član 18.**

### **(Profesionalni sportski klub)**

- (1) Profesionalni sportski klub osniva se kao privredno društvo s ciljem obavljanja sportske djelatnosti.
- (2) Profesionalni sportski klub osniva se i registrira u skladu sa Zakonom o privrednim društvima i Zakonom o registraciji poslovnih subjekata, Zakonom o sportu u BiH i ovim zakonom.

## **Član 19.**

### **(Privredno društvo u oblasti sporta)**

- (1) Privredno društvo, u smislu ovog zakona, je društvo registrovano za obavljanje sportskih djelatnosti propisanih ovim zakonom.
- (2) Ako privredno društvo obavlja sportsku djelatnost učestvovanja u sportskim takmičenjima mora imati pravni oblik dioničkog društva.
- (3) Na osnivanje i rad privrednih društava iz stava (1) ovog člana primjenjuje se Zakon o privrednim društvima, osim ako ovim zakonom nije drugačije određeno.

## **Član 20.**

### **(Sportsko društvo)**

- (1) Sportski klubovi mogu se, radi ostvarivanja zajedničkih ciljeva i interesa, kao i zajedničkog nastupanja u oblasti sporta, udruživati u sportska društva.
- (2) Međusobne odnose i prava sportski klubovi udruženi u sportsko društvo regulišu osnivačkim aktom i drugim aktima sportskog društva.
- (3) Sportsko društvo je nosilac prava na zajednički naziv i zajedničke simbole, ako osnivačkim i drugim aktima sportskog društva nije drugačije određeno.
- (4) Na osnivanje, opis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi sa radom sportskih društava, primjenjuju se odredbe ovog zakona koje se odnose na sportska udruženja, ako ovim zakonom nije drugačije određeno.

## **Član 21.**

### **(Sportski savez općine)**

- (1) Sportski klubovi na nivou općine u čijoj sportskoj grani nije osnovan općinski granski sportski savez udružuju se u općinski sportski savez, putem kojeg općina ostvaruje svoj javni interes u oblasti sporta.
- (2) Općinski sportski savezi udružuju se u Sportski savez Kantona.
- (3) Općinski sportski savez je nosilac prava na zajednički naziv i zajedničke simbole, ako osnivačkim i drugim aktima Općinskog sportskog saveza nije drugačije određeno.

## **Član 22.**

### **(Općinski granski sportski savez)**

- (1) Ako na području općine djeluje najmanje tri sportska kluba u istoj sportskoj disciplini, može se osnovati općinski granski sportski savez u toj sportskoj disciplini.
- (2) Općinski granski sportski savezi udružuju se u kantonalni granski sportski savez.

## **Član 23.**

### **(Kantonalni granski sportski savez)**

- (1) Općinski granski sportski savezi i sportski klubovi u pojedinim sportovima udružuju se u granske saveze Kantona radi ostvarivanja zajedničkih ciljeva i interesa, zajedničkog nastupanja u oblasti sporta i organizovanja takmičenja na nivou Kantona.
- (2) Kantonalni granski sportski savezi se udružuju u Sportski savez Kantona, kao i granske sportske saveze organizovane na nivou Federacije BiH i Bosne i Hercegovine.
- (3) Za jedan sport može se na nivou Kantona osnovati jedan granski savez.
- (4) Kantonalni granski sportski savezi se osnivaju u skladu sa ovim zakonom i Zakonom o udruženjima i fondacijama.
- (5) Ako zbog nerazvijenosti sporta na području Kantona ne postoji organizovan kantonalni granski sportski savez, registracija saveza na nivou Kantona izvršit će se uz saglasnost Ministarstva, a do ispunjenja uvjeta iz stava (1) ovog člana.

## **Član 24.**

### **(Sportski savez Kantona)**

- (1) Općinski sportski savezi, Kantonalni granski sportski savezi i Sportski savez invalidnih lica Kantona udružuju se u Sportski savez Kantona.
- (2) Međusobne odnose i prava članice Sportskog saveza Kantona regulišu osnivačkim aktom i drugim aktima Sportskog saveza Kantona.
- (3) Sportski savez Kantona je nosilac prava na zajednički naziv i zajedničke simbole, ako osnivačkim i drugim aktima Sportskog saveza Kantona nije drugačije određeno.
- (4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi s radom sportskih saveza, dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

## **Član 25.**

### **(Nadležnost Sportskog saveza Kantona)**

Sportski savez Kantona nadležan je za:

- a) organiziranje poslova izrade radne verzije Strategije za Ministarstvo,
- b) organiziranje poslova izrade radne verzije programa razvoja sporta Kantona u skladu sa Strategijom za Ministarstvo,
- c) saradnja s nadležnim sportskim i drugim organima Federacije BiH i Bosne i Hercegovine,
- d) zastupanje i predstavljanje sporta u F BiH,
- e) pripremanje reprezentativaca za nastupe na zvaničnim takmičenjima,
- f) predlaganje članova Vijeća,
- g) obavljanje administrativnih, stručnih i drugih poslova u oblasti sporta u skladu s ovim zakonom.

## **Član 26.**

### **(Sportski klub invalidnih lica)**

- (1) Radi organizovanja sportsko-rekreativne aktivnosti i sportskih takmičenja invalidnih lica osnivaju se sportski klubovi invalidnih lica.
- (2) Sportski klub invalidnih lica može obavljati sportsku aktivnost amaterski i profesionalno.

## **Član 27.**

### **(Amaterski sportski klub invalidnih lica)**

Amaterski sportski klub invalidnih lica je dobrovoljna, nevladina, neprofitna organizacija koja se osniva i registruje kao udruženje građana za obavljanje sportske djelatnosti, u skladu sa Zakonom o udruženjima i fondacijama i ovim zakonom.

## **Član 28.**

### **(Profesionalni sportski klub invalidnih lica)**

- (1) Profesionalni sportski klub invalidnih lica osniva se kao privredno društvo s ciljem obavljanja sportske djelatnosti.
- (2) Profesionalni sportski klub osniva se i registriira u skladu sa Zakonom o privrednim društvima FBiH i Zakonom o registraciji poslovnih subjekata u FBiH, Zakonom o sportu u BiH i ovim zakonom kao i statutom sportskog saveza Kantona.

## **Član 29.**

### **(Sportski savez invalidnih lica)**

- (1) Sportski savez invalidnih lica se organizuje na nivou Kantona.
- (2) Sportski savez invalidnih lica Kantona osniva se u skladu sa Zakonom o udruženjima i fondacijama Bosne i Hercegovine i ovim zakonom.
- (3) Sportski savez invalidnih lica se udružuje u Sportski savez Kantona.

## **Član 30.**

### **(Udruženja sportske rekreacije)**

- (1) Radi zadovoljavanja potreba građana za održavanjem i poboljšanjem zdravlja i psihofizičkih sposobnosti i organiziranja bavljenja vježbanjem i sportskim aktivnostima u slobodno vrijeme, osnivaju se udruženja sportske rekreacije.
- (2) Udruženja – klubovi sportske rekreacije udružuju se u sportske saveze općine i u Savez sportske rekreacije Kantona.

## **Član 31.**

### **(Ustanove u oblasti sporta)**

- (1) Javnu ustanovu za obavljanje djelatnosti u oblasti sporta može osnovati Skupština Kantona, općinsko vijeće, samostalno ili s drugom pravnom odnosno fizičkim licem.
- (2) Ustanovu za obavljanje djelatnosti u oblasti sporta može osnovati domaće, odnosno strano pravno i fizičko lice u svim oblicima vlasništva.
- (3) Ustanova iz stava (2) ovog člana osnivaju se za obavljanje:
  - a) stručno razvojnih poslova, praćenja tjelesnih sposobnosti djece i omladine, studenata, invalida i drugih kategorija građana,
  - b) testiranje i pripremu vrhunskih sportista,
  - c) edukaciju i trening sportskih talenata.

## **Član 32.**

### **(Javna preduzeća u oblasti sporta)**

- (1) Javna preduzeća za proizvodnju, promet i usluge u oblasti sporta mogu se osnivati u skladu sa Zakonom.



## **POGLAVLJE II. PRAVA I OBAVEZE PRAVNIH LICA**

### **Član 33.**

#### **(Sportska udruženja)**

Sportska udruženja osnivaju se i organiziraju slobodno i samostalna su u ostvarivanju svojih prava i obaveza, u skladu sa Zakonom.

### **Član 34.**

#### **(Sticanje svojstva pravnog lica)**

Sportska udruženja stiču svojstvo pravnog lica upisom u registar koji vodi nadležni organ u skladu sa Zakonom.

### **Član 35.**

#### **(Skupština udruženja)**

Pravna lica, u smislu ovog zakona, registrirana kao sportska udruženja, moraju, osim osnivačkog akta i statuta, imati skupštinu kao najviši organ.

### **Član 36.**

#### **(Obavljanje privrednih djelatnosti sportskih udruženja)**

Sportska udruženja mogu obavljati privredne djelatnosti samo ako je osnovna svrha takvih djelatnosti ostvarivanje ciljeva utvrđenih statutom.

### **Član 37.**

#### **(Radni odnos u sportskim organizacijama)**

- (1) Pravna lica u oblasti sporta mogu zasnivati radni odnos sa sportistima, stručnim radnicima, stručnim i administrativnim osobljem.
- (2) Radni odnos u sportskim organizacijama, kao pravnim licima registriranim na nivou Kantona, uređuje se ugovorom o radu u skladu sa zakonom i kolektivnim ugovorom.
- (3) Zaposleni iz stava (1) ovog člana imaju sva prava i obaveze iz radnog odnosa utvrđene ovim zakonom, Zakonom o radu FBiH i kolektivnim ugovorom, ukoliko ovim zakonom nije drugačije utvrđeno.

## **POGLAVLJE III. FIZIČKA LICA U OBLASTI SPORTA**

### **Član 38.**

#### **(Fizička lica)**

Fizička lica u oblasti sporta su: sportisti, stručni radnici i sportski radnici.

### **Član 39.**

#### **(Sportista)**

Sportista je lice koje se priprema i učestvuje u organizovanim sportskim takmičenjima.

### **Član 40.**

#### **(Vrste sportista)**

- (1) Sportista se može baviti sportskim aktivnostima samostalno i u okviru sportskih organizacija.

- (2) Sportista koji sudjeluje u sportskim takmičenjima kao član pravnog lica iz člana (2) tačka b) alineja 1) ovog zakona može se baviti sportskim aktivnostima amaterski ili profesionalno.

#### **Član 41.**

##### **(Profesionalni sportista)**

- (1) Prava, obaveze i odgovornosti profesionalnih sportista uređuju se u skladu sa zakonom, sportskim pravilima nadležnog granskog sportskog saveza, kolektivnim ugovorom, pravilnikom o radu i ugovorom o radu između sportiste i sportske organizacije.
- (2) Profesionalni sportista zasniva radni odnos sa sportskom organizacijom, zaključivanjem ugovora o radu na određeno vrijeme, za period koji neprekidno ili sa prekidima traje najduže pet godina.
- (3) Ugovor između profesionalnog sportiste i sportske organizacije zaključuje se u pisanoj formi i registruje kod nadležnog kantonalnog granskog sportskog saveza, a u protivnom je ništav.
- (4) Ugovor između profesionalnog sportiste i sportske organizacije potpisuju sportista i lice ovlašteno za zastupanje sportske organizacije, a u slučaju da je sportista maloljetno lice bez potpune poslovne sposobnosti, ugovor može punovažno da se zaključi samo uz pismenu saglasnost roditelja, usvojitelja ili staratelja, uz nalaz zdravstvene ustanove kojim je prethodno utvrđena zdravstvena sposobnost maloljetnog lica.
- (5) Profesionalni sportista i sportska organizacija, prilikom zaključivanja ugovora o radu, mogu posebno ugovoriti davanja naknade sportisti na ime zaključenja ugovora.
- (6) Sportska organizacija dužna je da prije zaključivanja ugovora sportistu obavijesti o pravima, obavezama i odgovornostima iz stava (1) ovog člana.
- (7) Pravno lice je obavezno da zaključi ugovor sa profesionalnim sportistom.

#### **Član 42.**

##### **(Sportista amater)**

- (1) Prava, obaveze i odgovornosti sportista amatera uređuju se zakonom, sportskim pravilima nadležnog granskog sportskog saveza i opštim aktima sportske organizacije, a prava, obaveze i odgovornosti sportista amatera takmičara kojima se obezbjeđuje novčana naknada za bavljenje sportom i ugovorom između sportiste i sportske organizacije (ugovor o bavljenju sportom ili ugovor o stipendiranju maloljetnog sportiste za sportsko usavršavanje).
- (2) Ugovorom o bavljenju sportom sportista amater i sportska organizacija utvrđuju, u skladu sa sportskim pravilima, naročito: novčanu naknadu za bavljenje sportskim aktivnostima, novčane i druge naknade za ostvarene sportske rezultate, naknade troškova smještaja i ishrane za vrijeme sportskih priprema i sportskog takmičenja, naknadu za korišćenje lika sportsite i naknadu za nabavku sportske opreme.
- (3) Ugovorom o stipendiranju maloljetnog sportiste za sportsko usavršavanje utvrđuje se, u skladu sa sportskim pravilima, naročito: novčana stipendija, naknada troškova smještaja i ishrane za vrijeme sportskih priprema i sportskog takmičenja, naknada za nabavku sportske opreme i novčane i druge nagrade za postignute sportske rezultate.
- (4) Ugovorom iz stava (2) i (3) ovog člana može biti posebno utvrđena i naknada za zaključivanje ugovora.
- (5) Ugovor iz stava (2) i (3) ovog člana zaključuje se u pisanoj formi i registruje kod nadležnog kantonalnog granskog sportskog saveza, a u protivnom je ništav.
- (6) Sportska organizacija dužna je da prije zaključivanja ugovora sportistu obavijesti o pravima, obavezama i odgovornostima iz stava (1) ovog člana.

- (7) Pravno lice je obavezno da zaključi ugovor o bavljenju sportom ili ugovor o stipendiranju sa sportistom amaterom.

#### **Član 43.**

##### **(Obavezno osiguranje sportista amatera)**

- (1) Sportisti amateri koji nisu obavezno osigurani u smislu zakona kojim se uređuje penzijsko i invalidsko osiguranje mogu se uključiti u sistem obaveznog osiguranja pod uslovima, u obimu i na način predviđen tim zakonom.
- (2) Sredstva za penzijsko i invalidsko osiguranje sportiste iz stava (1) ovog člana mogu obezbjediti i sportske organizacije i druga pravna lica, djelimično ili u cjelini.
- (3) Sportista amater može biti zdravstveno osiguran u smislu zakona kojim se uređuje zdravstveno osiguranje, i to na način i u obimu utvrđen za osiguranike koji samostalno obavljaju djelatnost, u skladu sa zakonom kojim se uređuju doprinosi za zdravstveno osiguranje.
- (4) Sportistu amatera osigurava sportska organizacija ili drugo pravno lice koje ga ugovorom angažuje kod osiguravajućeg društva od posljedica povrede nastale sportskom aktivnošću.
- (5) Obaveze po osnovu osiguranja iz stava (3) ovog člana mogu preuzeti sportske organizacije ili druga pravna lica.

#### **Član 44.**

##### **(Ništavost, poništenje, prijevremeni sporazumni raskid ugovora i raskid ugovora)**

- (1) U slučaju utvrđivanja ništavosti, poništenja, raskida ugovora ili raskida zbog neispunjenja ugovornih obaveza, sportska organizacija je dužna da o tome bez odlaganja obavijesti kantonalni granski sportski savez.
- (2) Raskid ugovora između sportiste i sportske organizacije zbog neispunjenja ugovornih obaveza vrši se odlukom nadležnog suda, u skladu sa zakonom.

#### **Član 45.**

##### **(Stručna lica osposobljena za rad u sportu)**

- (1) Stručne poslove u oblasti sporta mogu obavljati isključivo stručna lica osposobljena za rad u sportu (u daljem tekstu: sportski radnici).
- (2) Pod stručnim licima osposobljenim za rad u sportu, u smislu ovog zakona, podrazumjevaju se lica koja ispunjavaju sljedeće uvjete:
  - a) imaju visoku ili višu stručnu školsku spremu iz oblasti tjelesnog odgoja i sporta, ili
  - b) imaju visoku, višu ili srednju školsku spremu iz drugih oblasti i licencu za rad u oblasti sporta, ili
  - c) imaju status vrhunskog sportiste s diplomom za rad u oblasti sporta.
- (3) Školovanje kadrova za rad u oblasti tjelesnog odgoja i sporta, te izdavanje diploma i licenci za rad u sportu obavljaju visokoškolske ustanove.
- (4) Stručno usavršavanje i osposobljavanje u sportu obavljaju visokoškolske ustanove i ustanove registrirane za poslove stručnog usavršavanja i osposobljavanja.

#### **Član 46.**

##### **(Vrste stručnih poslova)**

Stručni poslovi u sportu u smislu ovog zakona su:

- a) planiranje i realizacija sportskih aktivnosti djece i omladine,
- b) planiranje i realizacija sportske obuke,
- c) planiranje i treniranje sportista,
- d) obučavanje građana u sportskim znanjima i vještinama,
- e) planiranje i realizacija sportske rekreacije građana,

- f) dijagnosticiranje i provjera psihofizičkih i motoričkih sposobnosti učesnika,
- g) planiranje i izvođenje korektivne gimnastike,
- h) provođenje pravila u sportu,
- i) informatika u sportu,
- j) menadžment i marketing u sportu,
- k) naučno istraživačke djelatnosti.

#### **Član 47.**

##### **(Sportski radnici)**

Sportski radnici (sudije, delegati i drugi), u smislu ovog zakona, su stručna lica koja imaju licence nadležnog granskog sportskog saveza za obavljanje određenih aktivnosti u sportu, a u skladu sa pravilima nacionalnog sportskog saveza.

#### **Član 48.**

##### **(Zabrana diskriminacije)**

- (1) Zabranjena je svaka neposredna i posredna diskriminacija sportista u obavljanju sportskih aktivnosti, s obzirom na neko lično svojstvo, spol, status, opredjeljenje ili uvjerenje, uključujući i diskriminaciju profesionalnih sportista i sportista koji to žele da postanu u pogledu zapošljavanja, zarade ili uslove rada, osim kada se pravljenje razlike, odnosno stavljanje sportiste u nepovoljniji položaj u odnosu na druge sportiste u istoj ili sličnoj situaciji temelji na samoj prirodi ili stvarnim i odlučujućim uslovima obavljanja određene sportske aktivnosti, a ciljevi koji se time žele postići jesu opravdani.
- (2) Odredbe ugovora između sportiste i sportske organizacije u oblasti sporta kojima se utvrđuje diskriminacija sportiste-ništa su, a odredbe sportskih pravila i opštih akata organizacija u oblasti sporta kojima se utvrđuje diskriminacija sportiste-ne primjenjuju se.
- (3) Sportisti koji nema punovažno zaključen ugovor sa određenom sportskom organizacijom ne može biti sportskim pravilima uskraćeno pravo zaključenje ugovora o radu sa drugom sportskom organizacijom, odnosno prelazak u drugu sportsku organizaciju i nastupanje za nju na sportskim takmičenjima u svojstvu profesionalnog sportiste.
- (4) Sportista ima pravo na naknadu štete koju pretrpi aktima diskriminacije sportske organizacije iz stava (1), (2) i (3) ovog člana.
- (5) Pravo na naknadu štete iz stava (4) ovog člana sportista ostvaruje u skladu sa Zakonom o obligacionim odnosima.

### **POGLAVLJE IV. ZDRAVSTVENA ZAŠTITA U SPORTU I ANTIDOPING KONTROLA**

#### **Član 49.**

##### **(Obavezna zdravstvena zaštita)**

- (1) Zdravstvena zaštita je obavezna je za sve učesnike u sportu.
- (2) U sportskim takmičenjima može učestvovati samo lice za koje je utvrđena opća i posebna zdravstvena sposobnost, koju utvrđuje ovlašteni ljekar specijalista.

#### **Član 50.**

##### **(Uvjeti za obavljanje zdravstvenih pregleda)**

Obavljanje zdravstvenih pregleda sportista, te način vođenja evidencije i medicinske dokumentacije sportista realizira se u skladu sa federalnim propisima.

#### **Član 51.**

##### **(Zabrana dopinga)**

Sportistima i svim učesnicima u sportu zabranjeno je uzimanje nedozvoljenih stimulativnih sredstava, davanje ili podsticanje njihovog korištenja u skladu sa pravilima Svjetske antidoping agencije (WADA).

### **DIO ČETVRTI – SPORTSKA TAKMIČENJA I PRIREDBE, SPORTSKI OBJEKTI I SUZBIJANJE NEDOLIČNOG PONAŠANJA NA SPORTSKIM PRIREDBAMA, INFORMATIKA U SPORTU**

#### **Član 52.**

##### **(Cilj sportskih takmičenja)**

Sportska takmičenja i priredbe (manifestacije, susreti, smotre, igre) organiziraju se s ciljem afirmacije i popularizacije sporta i ostvarivanja vrhunskih sportskih rezultata.

#### **Član 53.**

##### **(Sistem, uvjeti i organizacija takmičenja)**

Sistem, uvjete i organizaciju sportskih takmičenja na nivou Kantona utvrđuju granski savezi Kantona, u skladu sa odredbama ovog zakona i pravilima međunarodnih sportskih asocijacija.

#### **Član 54.**

##### **(Usklađenost s Evropskom konvencijom)**

Organizacija sportskih takmičenja i priredbi mora biti usklađena s preporukama Evropske konvencije o suzbijanju nasilja i nedoličnog ponašanja gledalaca na sportskim priredbama, posebno na nogometnim utakmicama, i odgovarajućim zakonima i drugim propisima u Bosni i Hercegovini.

#### **Član 55.**

##### **(Saglasnost za međunarodna takmičenja)**

Međunarodna sportska takmičenja i sportske priredbe mogu se organizirati u Kantonu ako organizator dobije saglasnost nadležnog federalnog organa, te osigura uvjete predviđene pravilima međunarodnih sportskih organizacija.

#### **Član 56.**

##### **(Sportski objekat)**

- (1) Sportski objekat je u smislu ovog zakona, višenamjenski otvoren ili zatvoren prostor namijenjen sportskim aktivnostima.
- (2) Sportski objekat, pored prostora namijenjenog sportskim aktivnostima, mora imati neophodne prateće sadržaje i opremu te biti pristupačan invalidnim licima.
- (3) Sportski objekti moraju ispunjavati propise međunarodnih sportskih asocijacija kao i standarde propisane odgovarajućim zakonima i drugim propisima.

#### **Član 57.**

##### **(Kategorizacija sportskih objekata)**

Kategorizacija sportskih objekata se utvrđuje u skladu s posebnim pravilnikom o kategorizaciji sportskih objekata, Ministarstva civilnih poslova BiH.

### **Član 58.**

#### **(Suzbijanje nasilja i nedoličnog ponašanja gledalaca na sportskim priredbama)**

- (1) Obaveza organizatora sportskih priredbi je bezbjednost održavanja sportskih natjecanja koja podrazumjeva: bezbjednost gledalaca, takmičara i drugih učesnika sportskog natjecanja ili sportske priredbe i stvaranje okruženja koje sprječava, suzbija i sankcioniše nedolično ponašanje, nered, te nasilje, prije, za vrijeme i nakon sportskog natjecanja ili sportske priredbe, zaštita gledalaca, zaštite drugih građana i njihove imovine i imovine pravnih lica.
- (2) Suzbijanje nasilja i nedoličnog ponašanja gledalaca na sportskim priredbama se provodi u skladu sa zakonom i drugim propisom.

### **Član 59.**

#### **(Informacioni sistem u sportu)**

- (1) S ciljem sistematskog praćenja i evidentiranja stanja u sportu, stručne, naučne i izdavačke djelatnosti, organizira se jedinstveni informacioni sistem u sportu.
- (2) Sadržaj i oblik informacionog sistema usklađuje se sa aktima sektora za sport Ministarstva civilnih poslova BiH, i standardima evropske sportske informacione mreže.
- (3) Informacioni sistem Kantona sastavni je dio informacionog sistema BiH.
- (4) Sva pravna i fizička lica registrirana za obavljanje sportskih aktivnosti obavezna su voditi evidenciju u skladu s jedinstvenim informacionim sistemom u sportu.
- (5) Informacioni sistem u sportu na području Kantona vodi Sportski savez Kantona u saradnji sa granskim sportskim savezima, u skladu sa sadržajem i oblikom informacionog sistema iz stava (2) ovog člana.

## **DIO PETI – FINANSIRANJE SPORTA**

### **Član 60.**

#### **(Sredstva za finansiranje)**

Sportske aktivnosti finansiraju se:

- a) od članarina,
- b) iz budžetskih sredstva Kantona i budžetskih sredstava općina na području Kantona,
- c) iz donacija i sponzorstva pravnih i fizičkih lica,
- d) iz prihoda od kamata i zakupnina,
- e) od igara na sreću,
- f) iz prihoda stečenih aktivnostima utvrđenim statutom sportske organizacije,
- g) iz drugih izvora.

### **Član 61.**

#### **(Sredstva za finansiranje javnog interesa Kantona)**

- (1) Javni interesi Kantona u oblasti sporta, ostvaruju se sufinansiranjem sporta iz sredstva budžeta Kantona.
- (2) Općine će u skladu sa svojom odlukom iz budžeta općine finansirati sportske programe putem sportskog saveza na svom području.

### **Član 62.**

#### **(Način finansiranje sporta)**

Finansiranje sporta vrši se i iz javnih sredstava kojima se podstiče obavljanje sportskih djelatnosti, u skladu sa kriterijima koje utvrđuje Vlada Kantona, odnosno nadležni organ općine.

### **Član 63.**

#### **( Finansiranje učeničkih klubova)**

Sportsku djelatnost učeničkih klubova osnovnih i srednjih škola u pravilu finansira osnivač škole iz redovnih sredstava škole, ali se dio sredstava može osigurati i iz sredstava namijenjenih za oblast sporta.

### **Član 64.**

#### **(Kantonalna nagrada za sport)**

- (1) Za izuzetan doprinos u razvoju sporta i afirmacije Kantona utvrdit će se kantonalna nagrada za sport, kao naviše kantonalno sportsko priznanje.
- (2) Nagrada se dodjeljuje pravnim i fizičkim licima koja obavljaju sportsku djelatnost.
- (3) Nagrada se može dodjeliti i drugim pravnim i fizičkim licima zaslužnim za razvoj sporta u Kantonu.
- (4) Kriterije za dodjelu nagrade kao i organizaciju dodjele utvrđuje Vlada Kantona na prijedlog Ministarstva.

## **DIO ŠESTI – NADZOR NAD PROVOĐENJEM ZAKONA**

### **Član 65.**

#### **(Nadzor nad provođenjem zakona)**

- (1) Nadzor nad provođenjem ovog zakona i propisa donesenih na osnovu ovog zakona na nivou Kantona, vrši Ministarstvo.
- (2) Inspeksijski nadzor nad provođenjem ovog zakona vrši nadležni inspektor.

## **DIO SEDMI – KAZNENE ODREDBE**

### **Član 66.**

#### **(Kaznene odredbe)**

- (1) Novčanom kaznom u iznosu od 1.000,00 KM do 5.000,00 KM kaznit će se za prekršaj pravno lice ako:
  - 1) obavlja sportsku djelatnost a nije registrirano i upisano u registar u skladu s odredbama ovog zakona i Zakona o sportu u BiH (član 11),
  - 2) zaključi ugovor sa profesionalnim sportistom i sportistom amaterom suprotno odredbama člana 41 stav (7) i člana 42 stav (7),
  - 3) zaključi ugovor sa sportistom amaterom suprotna odredbama člana 42,
  - 4) obavljanje stručnih poslova u sportu prepusti licima koji za to ne ispunjavaju zakonske uslove (član 45),
  - 5) vrši diskriminaciju sportista (član 48),
  - 6) omogući da na sportskom takmičenju učestvuje lice za koje nije utvrđena opća ili posebna zdravstvena sposobnost (član 49),
  - 7) organizira sportska takmičenja i sportske priredbe u Kantonu, a da za to ne ispunjava uslove u smislu ovog zakona i Zakona o sportu u BiH (član 54),
  - 8) organizira međunarodna sportska takmičenja, a da nema saglasnost nadležnog organa (član 55),
  - 9) organizuje sportsku manifestaciju u objektu koji ne ispunjava uslove utvrđene važećim propisima (član 56),
  - 10) ne izvrši obaveze iz člana 58 stav (2),
  - 11) ne vodi evidenciju u skladu sa jedinstvenim informacionim sistemom u sportu (član 59 stav (4))

- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 500,00 KM do 1.500,00 KM.

#### **Član 67.**

##### **(Kaznene odredbe)**

Novčanom kaznom u iznosu od 300,00 KM do 1.500,00 KM kaznit će se za prekršaj fizičko lice ako:

- 1) se bavi stručnim radom u oblasti sporta, a ne ispunjava uslove utvrđene članom 45,
- 2) sportista i drugi učesnik u sportu uzima nedozvoljena stimulativna sredstva ili podstiče njihovo korištenje (član 51).

### **DIO OSMI – PRIJELAZNE I ZAVRŠNE ODREDBE**

#### **Član 68.**

##### **(Obaveza donošenja podzakonskih akata)**

- (1) Propisi za provođenje ovog zakona iz člana 5, 7, 11, 62 i 64 donijet će se u roku od godinu dana od dana stupanja na snagu ovog zakona.
- (2) Do donošenja propisa iz stava (1) ovog člana primjenjivati će se postojeći propisi ukoliko nisu u suprotnosti sa ovim zakonom.

#### **Član 69.**

##### **(Obaveza usklađivanja akata)**

- (1) Danom stupanja na snagu ovog Zakona prestaje da važi Zakon o sportu Bosansko – podrinjskog kantona Goražde („Službene novine Bosansko – podrinjskog kantona Goražde“, broj: 5/04)
- (2) Sportski savez Kantona i sportski savezi općina su dužni usladiti svoje akte sa ovim zakonom u roku od 6 mjeseca, a sportski klubovi u roku od 9 mjeseci od stupanja na snagu ovog zakona.

#### **Član 70.**

##### **(Stupanje na snagu Zakona)**

Ovaj zakon stupa na snagu osmog dana od dana objavljivanja u "Službenim novinama Bosansko – podrinjskog kantona Goražde"

**Skupština Bosansko- podrinjskog  
Kantona Goražde**

**Predsjedavajući Skupštine**

\_\_\_\_\_

**Dr. Alija Begović**

**Broj: \_\_\_\_\_/10**

**Goražde: \_\_\_\_\_/10**